



## FIADIDIANA NY REPOBLIKA

### **FAMPITAM-BAOVAO**

#### **Fihaonan'ny Filoham-pirenena Andry Rajoelina tamin'ireo mpisehatra eo amin'ny seha-pihariana lavanila**

Nitohy tao Antalaha ny fitsidihana ny Faritra SAVA izay tanterahin'ny Filohan'ny Repoblika Andry Rajoelina androany 30 oktobra 2021. Anisan'ny nanamarika ity andro faharoa ity ny fihaonany mivantana tamin'ireo solon-tenan'ireo mpisehatra isan-karazany eo amin'ny seha-pihariana lavanila eto anivon'ny Faritra SAVA dia ireo tantsaha mpamokatra, ireo mpanangom-bokatra ary ireo mpanondrana izany. Natao izao fihaonana izao hoy ny Filoha Andry Rajoelina mba hahafahan'ny Fitondram-panjakana mametraka paikady mahomby hahafahana manatsara ny seha-pihariana lavanila ary indrindra hiarovana ireo mpisehatra isan-karazany ireo satria harem-pirenena ny lavanila.

Nisy ny fehin-kevitra nifanekena fa ho raisina manomboka izao mba hiarovana io seha-pihariana io. Anisan'izany ny famerana ny vidin'ny lavanila manta tsy ho latsaky ny 75 000 Ar. Ny tanjona dia mba tsy hanaovana tsindrio fa lavo ireo tantsaha mpamboly. Tsy misy mpisehatra tokony ho latsa-danja eo amin'ity seha-pihariana ity ary tokony hahita tombony avokoa na iza na iza hoy hatrany ny Filoha. Ireo raharraham-barotra rehetra dia tokony horaketina an-tsoratra ary hambara ao ny anaran'ny mpividy sy ny vidiny nandraisana izany. Hasiana fitomboka ihany koa ireo lavanila varotana mba hahafahana manara-maso ny niavany sy ny handefasana azy ireny amin'ny fotoana rehetra. Hapetraka ny digitalisation ka hanana ny karatra maha-matianina avokoa ireo mpisehatra sy ireo mpandraharaha mba hahafahana manara-maso azy ireo. Hentitra ny Filoham-pirenena raha nilaza fa harahi-maso antsakany sy andavany ny fanondranana rehetra manomboka izao ka tsy hahazo taratasy fahazoan-dalana manondrana avy amin'ny Ministera mpiahy intsony ireo tsy mahafeno ny fepetra sy ny fitsipika rehetra napetraka. Ilaina araka izany ny fikaondohan'ireo mpisehatra rehetra voakasik'izany mialoha ny taom-pihotazana mba hahafahana mametraka ireo fepetra ireo.

Anisan'ny nampitaraina ireo mpamokatra ihany koa ny fangalarana lavanila ka hapetraka manomboka izao ny "brigade spéciale" hiaro sy hanara-maso ireo voly lavanila. Ny Faritra SAVA sy Analanjirofo no hametrahana izany, ary tolorana fiara tsy mataho-dalana sy moto izy ireo mba hahafahany miaro sy mifehy ireo toerana ahitana voly lavanila ao anatin'ireo faritra roa ireo. Hentitra ihany koa ny sazy ho an'ireo izay tratra mangalatra lavanila sy ireo mividy lavanila halatra. Ny Fitondram-panjakana rahateo dia handroso volavolan-dalana eo anivon'ireo Antenimiera roa tonta mba hisokajiana ny halatra lavanila ho heloka be vava.

Mila mifampitsinjo sy mifanome tanana isika Malagasy mba hampiroboroboana ny seha-pihariana lavanila izay reharehantsika eo imason'izao tontolo izao, hoy hatrany ny Filoha Andry Rajoelina.

Nentin'ny Filoha namaranana ity fitsidihany ny Faritra SAVA ity ny fihaonany tamin'ireo vahoakan'Antalaha tonga maro be teo amin'ny kianja. Tsy diso anjara ihany koa i Antalaha satria fotodrafitsara maro no eo an-dalam-panamboarana ao amin'izany distrika izany tahaka ny "Maison de la Vanille", ny oniversite manara-penitra, ny kianja mitafo manara-penitra ary ny fametrahana ny "parc solaire" izay hampihena ny vidin-jiro any amin'ny antsasany ho an'izany distrika izany. Efa eo am-pandinihana ny fanarenana ny lalana mampitohy an'Antalaha sy Maroantsetra ny fitondram-panjakana ankehitriny hoy hatrany ny Filoha.

**Ny sampan-draharahan'ny Serasera sy ny Fifandraisana**

**30-10-2021**